

Kayëte ndënkwëryënkw mba Piyer

Wade yehëhna kayëte Piyer

Piyer afayik Yesu Këris yeho. Yesu macëkawo wati nte pëladëhëhniwō wëyis ña. (Lik 5.1-11; Matiye 4.18-22) Wati rac Simo macëdeho. Ahwëhn a Yesu nkwëcëtëkawo wãc ÿa Simo maca Sefas (San 1.42), umë fëhnëtanëk taka (gë watëvav ña, «pierre»).

Wati nte ndokujëdëho Yesu ña, Piyer darël lëwū nkeho kwëlëkwël. Mama nkehahnëko rac, anjahëtakawo Ahwëhn a wahwënta warar, gante ntehnëkawo Yesu ka ani gë pëlahnënde ÿa. Ankentahniko hnë viyary vëryënkwëryënkw g'iyag nte pëyayiniho ibëhn Yesu ña do, ga ndëcëk watac, nkoko kahnënda hnë pëyahn Wanës Wakasëk hna.

Ntiyahnëkëfu paryi Piyer Rom hna nkeho ga cëmëk Afayik Pol hnë bëhn wafëhw imbëd g'iryaw gë warar ma bëhn wafëhw imbëd gë ryaw gë wahnah (63 gë 64) ga ndëcëk hnagi Yesu ÿa.

Piyer kerëhnëkëhniwo kayëte ntëwū ña vële hwëtahnëk ye hnë vankol imbëd vambë Asi Toy hn'ile macik gaki Tirëki hna. Andënkwëtehnëdëhëhni wayëhw nuñani hnë Këris hna do kamënañëhnëhni fëna mañëhnëniha Wënu ña paß gë wahorot do ibërehn soñe ikwëtahn ntëw hni Këris ña.

Piyer tēyēdēhēhni fēna ntēnēnēlēni: ale-wo-ale paß gē vēsankaf va, vērionkuṅ va paß gē vēle hwēhnēkēhni, vēsēval va paß gē vēsan hni, do vēsan va paß gē vēsēval hni.

Wēlin wanēs wakwēhn nafa hn'iṅi kayēte: uhorot, imawēhn, wameh, iyir.

Wēlin gante nke kayēte ka:

Simpaṽi (1.1-2)

Itama g'imac njasa pacah (1.3-2.3)

Itaka nte yēnēd gē bulunda le rēhnayik (2.4-12)

Imawēhn (2.13-3.7)

Uhorot lakēnde alind ufērēn (3.8-22)

Itav wameh do demal (4.1-11)

Mbetani vēle horotēd had Kēris (4.12-19)

Vicēr gē vēle hahnēndak va (5.1-11)

Simpaṽi rēkwa (5.12-14)

Simpaṽi

¹ Ami Piyer, afayik Yesu Kēris ṽa, herēhnēryidēhu wūhnē vēle tēhnak do ye vēhneh sampēk hnē wayal Pon gē Galasi gē Kapadōs gē Asi do gē Bitini vi.

² Wēnu ṅa Rēm ṽa tēhnaku had gante njētēko kobēri ka; gē Iyir Ipacah ṅa pitirun soṅe lēwu. Ha, tēhnaku dānko aṽawēhnahnuna Yesu Kēris do pacēnahnu g'icēlēvahn sat lēwu ṽa.

Arabi ipērēna ṅa gē yam ṽa nkwēnawu dūs!

Itama nte wok cēmēdīna

³ Cēmbēnēfuna ale ye Wēn gē Rēm Ahwēhn fu ṽa Yesu Kēris: hnē ikayēhnahn cankaf ntēwu hna, anagēkēfu g'ahawāry g'imat Yesu Kēris

fagant vësëm, soŋe nuŋayin itama nte wok cëmëdina,

⁴ do soŋe nuŋayin intëw̃ inte wok bëvëdina muk, tonkëdina, do igwam ntëwu ŋa cëvëdina. Irac kwëtëhnëku mbin hna,

⁵ w̃uhnë vële keryëd gë fanka falëwu fa, gë fere ikwëtahn soŋe ipeh nte fëhwëtak tufëhna wati rëkwa hna.

⁶ Soŋe umë pëbëryiwu uhnatah w̃a, lakënde soŋe wati roy tëfëka ahoroteyehniwu gë fop wasifa wayëkëhnahn.

⁷ Iyi horot tufahnëd ikwëtahn hun ŋa paryi nke. Sanu ŋa kode përekani, bare hwëdëh hna nuđe bi nkwamëk. Aki fëna ikwëtahn hun ŋa le ŋak hnëfak gë sanu yi njëkëhnahnik hnë fop wasifa wahorot hna, soŋe njëtahni njawëk. Tac fac le mbokajëd Yesu Këris ŋa, gë fere ikwëtahn hun ŋa nkeď idëwan, icëmb do idënën.

⁸ Nahnërunëha hara nulunahna, gaki kwëtahnërunëha hara nulunahna, do uhnatah hun w̃a camëk hafo le nkoyik kodena tëfëtayi gë wanës,

⁹ kabi tëkën ŋa rëkënëďfun ile njëkëlehnëd ikwëtahn hun ŋa: umë ye ipeh walaŋary hun w̃a.

¹⁰ Kobëri ŋa, wakila Wënu ŋa njëkëlehnëni paryi nuni hak Wënu ŋa pehëtëďëhëhni vahnë va. Apëyahnëniho soŋe iŋi peh nte njëďaďëhu Wën.

¹¹ Wakila watac njëkëlehnëni njëtëni guve do hak ntiyaď irac. Iyir Këris ŋa hnë vëhni nkeho, do pëyahnëko kobëri ŋa wahorot wale rëfëkawo nuŋa Këris ŋa do g'icëmb inte rëfëďëha ŋa.

12 Wënu ɲa njëtëndanëkëhni waji wanës gena soɲe lëw̃ hni dënk, bare soɲe hun yëdahnik. Doliyi vëfëyahn Wanës Wakasëk ɲa nësëhnënihu watac gë Iyir Ipacah nte yëdahnijik ambin ɲa. Do wamëleka ɲa dënk ñadëni d̃us njëtëni rac.

Imac njasa pacah

13 Soɲe umë ye, naharyin ile rëfëka aliwu ÿa, nëgaryin do kwëtëryin fop tama hun ɲa hnë uyëd̃ ipëh nte yëd̃aderun fac le mbokajëd̃ Yesu Këris ÿa.

14 Mawëhnëryina Wënu ɲa had vutah vupërën: Ant'arëfu viña vimeh waβë kobëri ɲa, wati nte nkorunëho yëtëluhna toña ɲa.

15 Bare had gante pacëk ale w̃acëku ka, w̃uhnë fëna geryin vëfacah hnë fop vankeya hun hna,

16 kabi kerik: «Geryin vëfacah, kabi ami pacëbu.»✧

17 Hnë wayëfa hun hna, macëd̃unëha «Apa» ale hitiɲëd̃ ale-wo-le ile ntik ÿa hara dëbëndëlehnëlihëhniha vahnë va. Soɲe rac ye, geryin vëlënën Wën, wati le yehahnërun nkal li.

18 Ankeya nte hnuŷarun gë vacërakëlo hun vi yiryeryëd̃ina karyënk̃w. Bare njëtërun, Wënu ɲa cosahnëk icos cankaf soɲe pehëtahnu hnë aɲi sifa nkeya. Dinahna gë viyë vile fërëkad̃, had sanu ma kori.

19 Bare pehëtëku gë sat fërën Këris ÿa, umë ale ye had fape fante wok kwëhnana dahëse wëh do ñoñ nuɲena ile wek.

✧ **1:16 1.16:** Soɲe Walevi 19.2

²⁰ Wënu ɲa tëhnakawo ani gë ntihahnënd ðuniŷa ŷi, atufahnëka gaki hnë waŷi wawati wale ye warëkwa, soŋe hun.

²¹ Wuhnë, paß gë Këris kwëtahnërunëha Wënu ɲa, umë ale vēhnëndanëka fagant vēsëm do yëðaka icëmb; aki kwëtëðfun ikwëtahn hun ɲa do itama hun ɲa Wën hna.

²² Maŷëhnërun toña ŷa do koyëna pacënërun vintaŷary hun va, alihahnu inahnël catah vēŷënta hun. Nahnëlëryin ðus gë vēŷënta hun gë ntaŷary hun fop.

²³ Nagirun hnë uwám hasëk, ule wok matina hnë uhnëða ule fuð bare ule ŷatik hnë uhnëða ule wok cëmëðina: Wanës Wën wabë kantëm.

²⁴ Kabi,
«Mbahn ɲi nke had dël,
do fop icëmb dëwu ɲa had ufëtel dël;
dël ɲa kankëð do ufëtel ulëwu ŷa njoð;
²⁵ bare unës Ahwëhn a nkod kantëm.»[✧]
Uwi nës, Wanës Wakasëk wante fëyayirun ye.

2

¹ Doliŷi cañëtaryin fop ile ŷëk; antë arokawuna ahnë, antë ayewu vēhurubak, antë ayewu vēŷëŷary, antë ahnesu wameh vēŷëntawu.

² Had fanul, balëryiŷu wambël wapacah wante ryavëð ntaŷary ðanko, g'umë, ahnaŷëntiŷu hn'ipeh hna,

³ kabi, had gante nësëk vikerëh ka: «andahërun gante nëŋëk Ahwëhn ka.»[✧]

Itaka nte yënëf gë bulunda le rëhnayik

⁴ Pëharyina Ahwëhn a Yesu. Umë ye itaka inte yënëf. Vahnë va cañëtaniha, bare Wënu ña tëhnaka, do nkwamahnëkawo.

⁵ Wuhnë fëna, nkerun had wëraka wale yënëf wale yëryahnik cery nte nkehahnëk Iyir Ipacah, soñe ayehahnu bulunda facah vësëna wasadëha, soñe asënahnu wasadëha gante ntehnëku Iyir ka, do Wënu ña tebad soñe Yesu Këris.

⁶ Ha, ntehnik hnë Vikerëh hna:
«Wëli, atëhnañu itaka nte hnëfak
do kwëtëñu hn'inawñ Siyö hna taka
ndënkwëryënkw.

Ale hwëtëk ikwëtahn ntëwu ña hnë ýalu
yëtëdinahna muk usëfëhna.»✧

⁷ Soñe wuhnë vële hwëtahnëk, untënah. Bare soñe vële wok vëhwëtahnëna va,

«Itaka inte cañëtaniho vëvëry vacery ña
vacak ye tame inte mbëryahnëk Wënu ña
cery ntëwu ña fop.»✧

⁸ Do fëna ntehnik:

«Taka nte nkëwëdëni vahnë,
taka nte hëfëd.»✧

Nkëwëdëni vahnë vërac kabi vëwawëhnëna wanës Wënu ña do koyëna nuýadëni ile pëhwëtaniniho ýa.

⁹ Bare wuhnë, bulunda ile rëhnayik yerun, vësëna wasadëha ahnañ, bulunda facah, vahnë vële kwëhnëk Wën. Atëhnaku soñe afëyahnu vantiyehn vacamah vante ntik, umë ale wacëku

✧ 2:6 2.6: Esayi 28.16 ✧ 2:7 2.7: Wahnëw 118.22 ✧ 2:8 2.8: Esayi 8.14

asahnu mëhwëry hna, arëнку humpen hucamah hudëwu.

¹⁰ Kobëri ña, gelunohna bulunda, bare gaki bulunda Wën yerun; kobëri ña yëtëlnohna ikaÿëhnahn Wën, bare gaki nuÿarun ikaÿëhnahn ntëwu.✧

¹¹ Vëÿënta mën, wühne vële ÿahnëbu ðus, wühne vële ye vëhneh nkal li, vële ryëcalëd, nkaÿëtamu, tavëryin viña vimeh mbahn vinte wëtaryëd ntawary hun.

¹² Kwëhnaryin njasa përen fagant vële wok vëhwëtahnëlahna Këris; koyëna, lakënde mërahnëndënihu, ntehnëndëni vëwën yerun, afo njavëtëni vantiyehn vapëren hun va do cëmbëdëniha Wënu ña fac le njijëd hna.

Imawëhn vësankaf

¹³ Soñe Ahwëhn a, maÿëhnëryina asankaf-wo-asankaf: ahnaÿ ale ye nkaf vësankaf fop,

¹⁴ do waguverëner vële payëk va soñe kotëhnëhni vële wënëd va do cëkwaryënihëhni vële lid ufëren va.

¹⁵ Kabi ile ñaaf Wënu ña ye, vantiyehn hun vapëren va remënayëhnëkëhni vëhnënkwhah vële wok vëyëtëna iñë.

¹⁶ Geryin vahnë vële ye afaya, bare paya hun ña antë coÿ wameh wante lidun ña; geryin vëramp Wën.

¹⁷ Dënëneriyinëhni vahnë va fop, ñahnëryinëhni vëÿënta hun hn'ikwëtahn hna, maÿëhnëryina Wënu ña, dënëneriyina ahnaÿ a.

✧ **2:10 2.10:** Ose 1.6,9; 2.1,23,25

Imawëhn vëryokuŋ

¹⁸ Vëryokuŋ, maŵëhnëryinëhni vahnë vële ryokuŋehnedëhu, do dënënerinëhni, gena vële fërenak do ryuñënanedëhu fo, bare gë vële fërekak per.

¹⁹ Toña ye, ge mëkarun wahorot wale wok tëfeluhna, do ryuñënarun soŋe idënën Wën, rac ye nëfak paryi ŷa.

²⁰ Inëhne cëmb yehëhna ge duñënarun daf soŋe ile wënerun ya? Bare ge duñënarun wadaf ŋa soŋe uferën ile lirun ŷa, nëfak paryi ye haryënkW Wën hna.

²¹ Gena bi rac macëku Wënu ŋa? Kabi Këris fëna korotëk soŋe hun; atufëku nkaŵ ŋa danko arëfu vacëbëtel vantëwu va.

²² «Umë dina la uweh ryampo, wëla hwënta ryampo tokana ahnë.»*

²³ Umë ale ŷewik, maŵëna njewëg, hnë horot lëwu hna nësëna ntini wëh, bare kwëtëk tama ntëwu ŋa hnë Ahitiŋ asatah hna;

²⁴ umë ale, hnë mbahn dëwu hna, ndibëk wameh wadëw fu ŋa kërëwa hna, danko tavahnin wameh fu ŋa, do nkehahnin hnë uwám satah; umë ye ale sërehnik soŋe njërahnin.

²⁵ Akwëyerunëho had wape, bare gaki mbokajërun gë cape aheryëherya, ayaww walawwary hun.

3

Vësëval va gë vësan va

* 2:22 2.22: Esayi 53.9

¹ Wuhnë vësëval va fëna, tēfēka aṽaṽēhnēnduni vësan hun. Ge ntirun koyëna, vëryampo hnë vëhni, lakēnde vëhwētahnëna Wanës Wënu ṽa, ge njëkëni vankeya hun va, akwētahnēdëni. Do fop iṽin wëla nësëluhna,

² kabi nudëni gante pacëk vankeya hun ka do tufahnēd untënah.

³ Ant'aryëñu igwamëna mbahn, had ryaṽ mul, ma liya wëkayët sanu, do cudā viṽi vëhambah ntaṽi.

⁴ Hali, gwam hun ṽa tēfēka nke mbë ßambery ntaṽary hun hna, mbë hakili hnëṽah do hwëhn yam. Iṽi sifa gwam përekadina muk, do kwëhnaḵ vëhni Wën hna nafa sankaf.

⁵ Kobëri ṽa aki kayëtaḵëniho vësëval vëfacah vële hwëtëko tama dëṽ hni ṽa Wën hna: ntënënedënihëhniwo vësan hni.

⁶ Aki nkeho Sara. Ntënënekawo Abëraham; macëdëhawo Ahwëhnu. Wuhnë fëna nkedun had Sara ge ntirun ufërën hara ñoñ dakëluhna.

⁷ Wuhnë vësan va fëna, pabëryinëhni ḵus vësëval hun va do geryin ndampo fo, dënkwëtaryindën fanka hun fa këñëlahnëna gë fanka falëṽ hni fa. Dënënerinëhni, nuṽadëni had ṽuhnë uwám sër le njëḵand Wën. Diryin koyëna danko wayëfa hun ṽa antë mbok memaṽehni.

Uhorot lakēnde alind ufërën

⁸ Wëlin uhnës rëkwa lëmën: kwëhnaryin fop nahan ndampo fo, do gwëryëlëryin fëna. Nṽahnëlëryin ntëṽëlëṽun had vahnë hun; geryin vahnë vëhnëṽah, do ßanaryin haryënkṽ vëṽënta hun va.

9 Ge ahnë ntiku uweh, antë aliguna uweh; ge ahnë njewëku antë ayewëguna. Dëwanëhnëryindëna kwëlëkwël, kabi soje rac macahnëku Wënu na, d'anko ndëwahnu.

10 «Ale ýad nahn uwám

do nuýa wafac wafëren
tëfëka mëk ryëw lëwu hnë inës wameh
do wës lëwu gë wanës wante rokad,

11 ndarënd uweh wá do ntind ufëren,
njëkëlehn yam ýa do tëfëlehn g'intawáry
ntëwu fop.

12 Ahwëhn a keryëdëhëhni vësatah va,
do vanëf vantëwu va hnëpad wayëfa walëw
hni wá;

bare yëka Ahwëhn a niýahnëkëhni vële lid wëh
soje antë nke aýew alëw hni.»[☆]

13 Mo lidëhu uweh ge kahnëndarun idi ufëren
wá?

14 Lakënde ahnuýawu wahorot kabi ufëren
lidun, mbetadun. Antë ntaku gë ahnë, do antë
pëmpëhnahnu.

15 Bare ntënënerýina hnë wasakahn hun
hna Këris had Ahwëhn a. Ge ahnë tëyëku,
këbënarýin ayabahnu itamahn nte hwëhnarun
na.

16 Bare dirýin wajira fo do g'untënah,
g'ikwëhna nahan përen, d'anko vële hnësëd
uweh soje nkeya përen hun gë Këris na
cëfëhnëhni soje ile njewënihu ýa.

17 Ha, ge Wënu na ñad, apecek ahorot hnë
wapëren wante lidu na g'ile horotëdu hnë
wameh wante lidu na.

☆ 3:12 3.12: Wahnëw 34.13-17

18 Këris umë dënk korotëk hafo cëm hwënta ryampo fo soje wameh ña fop; umë ale wok menëna, acëmëk soje vahnë vēwën va. Ntiko koyëna ðanko njiryeryahnu gë Wën. Paß g'imbahn ntëwu ña ndawiko ðare paß g'iyir ña mbokaryijik wám hna.

19 Do njiko had iyir pëyahni imëk ntëwu ña wayir wale sëdiko kaso hna,

20 vēle woko vēwawëhnelahna Wënu ña kobëri ña, ante tufahnëdëho ðuñëna ntëwu ña wati nte ntidëho Nowe sisikulu ña. Vahnë vēle fehëntiko wënka va vēyabëlohna, mbëd gë vērar fo nkeniho.

21 Wanji wënka yeho had yarya le fehëtëdëhu gaki ÿa. Iyi yarya, gena idag ronk mbahn. Hali, dahëse ye le rufahnëd mëta imac Wën g'inahan përen. Rac fop ntiyað gë fere bëhn Yesu Këris,

22 umë ale hayëk ambin do lañak farëhw Wën hna. Wamëleka ña, gë vēsankaf va, gë fop vēyi vēyëntaw vile hwëhnak fanka ambin hna mawëhneniha.

4

Itav wameh

1 Atac, kabi Këris korotëk mbahn ntëwu hna, wuhnë fëna, kwëhnaryin nahan ndampo fo gë umë. Gena bi ale horotëk mbahn ntëwu hna ravëk wameh ña

2 ðanko, hnë wafac wale wojëka wã nkal li, uwám lëwu wã nke gante ñað Wënu ka, do tav wëbal wameh wëba vahnë?

³ Gwërënkehu wati idi had gante ñadëni ntini vahnë vële wok vëyëtëlahna Këris va: aki fo nke-yarëdëni, tëfëdëni wëbal wameh, andëwëdëni, atokëdëni dëcët do cedëni dëcët uñen bulunda hna, cëmbëdëni waravahn wasëfëhnahnah.

⁴ Gaki, kabi goluhna arëfëlëndu, gë vële wok vëhwëtahnëna va, hnë vankeya vameh dëcët hna, apëmpëhnahnëkëhni, do anjewëdënihu.

⁵ Bare afo nkabahnëni haryënkW Wën hna wante ntini ña. Akëbënak kitiñëhni vële wok gë vële sëmëk per.

⁶ Soñe umë ye vësëm va fëna pëyayini Wanës Wakasëk ña. Akitiñini paß g'imbahn ña had vahnë va fop, bare gaki kodëni nkeni paß g'Iyir ña had Wënu ña.

Gante tëfëka ndemalëndëni vële hwëtahnëk va

⁷ Wapuya d'uniña ña pëñajëk! Soñe rac, tëfëka ayewu vëseryah, do nëgëtëryin wahakili hun wã d'anko aholu ayëfahnëndu.

⁸ Ile ÿak nëfak ÿa, ñahnëlëryin d'us, kabi iñahn ña tavëhnëd wameh wayabah.

⁹ Yotoyehnëlëryin hnë watere hun hna g'uhnatah.

¹⁰ Wënu ña njëdaku wafere aryemalëndu gë vëyënta hun va. Geryin had vëryokuñ vëfëren vële hod paßëni wayëd wanëmpëlah Wën.

¹¹ Age ahnë nësëd, wanës wadëwu ña nke wëba Wën; ge ahnë ndemadëha ayëntaw, uryema lëwu wã nke gë fop fanka fale njëdaka Wën fa, d'anko, paß gë Yesu Këris, Wënu ña cëmbi hnë fop, umë ale hwëhnëk icëmb do imëk soñe kantëm. Nke koyëna!

Mbetani vële horotëd had Këris

¹² Vëyahnik mën, antë pëmpëhnahnu gante njëkëhnahnëderun gë wahorot wahambah ki. Antë ahnahawu waji tëfëlahna tëki.

¹³ Bare natëryiwu kabi nkentahnirun uhorot Këris hna, d'anko fac le nuhandëni vahnë icëmb ntëwu na natahnu paryi.

¹⁴ Mbetarun ge njewëderun kabi vërefal Këris yerun, kabi Iyir icëmb, Iyir Wënu na, hnë wuhnë nke.

¹⁵ Ahnë-wo-ahnë hnë wuhnë antë korot kabi aryaw vahnë, ale ma awen ye, ma kabi ale yentahnik wëba vëyëntaw ye.

¹⁶ Bare ge ahnë korotëd kabi kwëtahnëka Këris, antë cëfëhna; hali, camehna Wënu na fo had gante ntehnëdëni vahnë ka ava Këris ye.✧

¹⁷ Wati kitiñ na tëkik, do pëgwëhnahnëkëhni vahnë Wën va. Do ge pëgwëhnahnëkëfu, hak puhnadëhëhni vële wëyëk vëhwëtahnëna Wanës Wakasëk Wënu na?

¹⁸ Had gante nësëk Vikërëh ka:
«Ge ipëh vësatah va ntakëk,
hak nkedëhëhni vëyapah va
do vëwen va?»✧

¹⁹ Koyëna, vële horotëd kabi ma wëhnëni iña Wënu na njëdfaniha ayanah ahahnëndak a vinta wary vidëw hni va, do nko d' ntindëni ufërën wã.

5*Vicër gë vële hahnëndak*

✧ 4:16 4.16: Vantiyehn 11.26 ✧ 4:18 4.18: Wanira 11.31

¹ Doliyi vicer vile ye fagant hun va hnesehnedefu. Ami denk acer yebu had wuhne; sede yebu hne wahorot Keris hna, do nkentahnedebu hne icemb nte rufande. Welin wante reyedemu na:

² Keryeryin ntega nte kwetehnahneku Wenu na, ayekanduni hara gena forosima, bare afaya fo, had gante nad Wenu ka, gena soje avetahnu, bare kabi nadun paryi.

³ Ante aryecetahnuni ucankaf hun na vahn vele hwetehnahnrunehene va bare diryin gante tetetalahnedenihi ntega ka.

⁴ Do ge Asankaf veheryeherya va karyetajek, njedafehu penkw ahnaw, nte wok perekadina, soje imek.

⁵ Koyena fena, vekar, deneneryinehni vicer va. Do wuhne fop, hne nengele hun hna, cudaryin ibana, kabi Vikererh va ntehnk:

«Wenu na newekenehni vele hnaenad va, bare tufedehenehni perena dewu na vele vanad va.»^{*}

⁶ Awa, banaryin haryenkw fanka sankaf Wenu na, danko naenenahnu hne wati le tehnek hna.

⁷ Do taveryin ge um e fop wafempenhannah hun wa, kabi pabeke.

⁸ Negaryin, do kweteryin hakili! Kabi ayeew hun a, Sintani ya, yaselehned had vesehn ile ryekad, yekelened ale toked.

⁹ Kahnendaryin, yawenaryin hne ikwetahn hna, kabi njeterun vele hwetahnk nkal li fop va iyi horot nudeni vehni fena.

^{*} 5:5 5.5: Wanira 3.34

10 Wahorot hun wãa biyëdina. Wën, ale hwëhnëk vifërën fop, macëku soje ayentahniwũ hn'icëmb ntëwu kantëm hna kabi mbëmënkëlërun gë Yesu Këris. Umë dënk matëndëdëhu, njawënedëhu, njëdadëhu fanka fale hamëhnaÿehnëdëhu fa do kodeluhna ahëfiwũ.

11 Arabi imëk ija nke gë umë soje kantëm! Nke koyëna.

Simpaÿi rëkwa

12 Silëve* ryemako herëhnëryiwũ inji kayëte. Ge ami ye, aÿënta fu ahahnëndak ye. Kamënaÿehnëmu, do pëyamu rac ye ipërëna paryi Wënu ña. Yawënaryin hnë inji përena.

13 Vële hwëtahnëk ye Babilon va nkaÿëryinihu, Wënu ña tëhnakëhni had wũhnë. Ajë mën hnë kwëtahn hna Marëk nkaÿëryiku fëna.

14 Gaÿëryinëhni vële hwëtahnëka Yesu va g'ijahn nte rufande vëÿënta hna. Nuÿaryin yam ÿa, wũhnë vële kwëhnëk Këris va fop!

* 5:12 5.12 Silëve wacik fëna Silas.

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source files dated 1 May 2025
f961026b-f72f-5bd7-9f75-efa7f932577e